



(ciep banj 3)

Siz Ginbingz youq ndaw baugau vixok, gij bengwz hungmbwk seizdaih moq cib bi neix, youq gwnz lizsij Dangj raeuz, lizsij Cungguk moq, lizsij gaijgwz hailangh, lizsij hwnghat sevei cuji, lizsij hwnghat Cunghvaz Minzczuz, miz yiengh eiqngaih dangq lohbaiz. Aen Cunghgoz Gungcanjdangj buekguh bak bi gvaqdaeu neix youq mwh daj goek bae dizlien bienq ndaej engqgya genq engqgya ndongj, Dangj raeuz gij bonjlingx lingjdauj cwngei, gij bonjlingx dazyinx swhsiengj, gij bonjlingx cujiz vunzlai, gij bonjlingx haucauh ndawbiengz cungj ndaej gyaak haujai, Dangj caeuq yinzminz ginzcung seizseiz cungj gaenjaed lienzhaeh, Cunghgoz Gungcanjdangj youq gwnz roen lizsij seiqgyaiq hingzsei bienqvaq laegdaeuq, itloh cungj byaij youq baihnaj seizdaih, youq gwnz roen lizsij wngqdoi ndaw guk rog guk gak cungj fungsiemj caeuq gaujniemh, itcig cungj baenz diuz ndoksaen daengx guk yinzminz, youq gwnz roen lizsij dawzmaenh caeuq hwnghat yiengh sevei cuji miz gij daegsaek Cungguk, itloh baenz aen cehsim lingjdauj maenh' ak. Yinzminz Cungguk gij rengzyoengx yamqdin baenaj engqgya hungloet, gij cingsaenz buekguh engqgya rengzrd, gij saenqniemh bietdingh ndaejhingz engqgya giendingh, gikfat hwnj yiengh cingsaenz engqgya haenqrem gagrox caeuq cawjdoengh bae rapdawz faenhong lizsij, Cunghgoz Gungcanjdangj caeuq yinzminz Cungguk cingq au saenqsim bak boix bae doihaeu yiengh bonghyat hungmbwk Cunghvaz Minzczuz daj ndwn hwnjdaeu, fouq hwnjdaeu daengz ak hwnjdaeu. Gaijgwz hailangh caeuq hwnqguh sevei cuji yendaiva haeuilaeg guh baenaj, raiz ok le bien sawfaenz moq ginghei fatmaj riengvaiq caeuq ndawbiengz ciengzgeiz onjdingh song yiengh mbouj bingzciengz neix, guk raeuz hwnghat ndaej demhroengz gij giekdaej vuzciz engq maenhsaed, gij cidu baujcwn engq caezcienz, guhbaenz Cunghvaz Minzczuz fukhwng hungmbwk haeu daengz diuz roen baenaj mbouj doiq dauqlaeng haenx. Gohyoze sevei cuji youq aen Cungguk ngeihcib it sigij fat ok rengzhoengh moq, yiengh yendaiva Cungguk vih vunzloih guhbaenz yendaiva daezhawj le genjleh moq, Cunghgoz Gungcanjdangj caeuq yinzminz Cungguk vih gaijgez gij vwndiz vunzloih caezcaemh bungzdaengz haenx daezhawj gij dungxcaiz Cungguk, fueng' anq Cungguk, ligliengh Cungguk engq lai engq ndei, vih vunzloih hozbingz caeuq fazcanj aen saehnieb hungsang youh caiq ok goengrengz engq hung!

Siz Ginbingz gangj haiok aen diendeih moq Majgwzswu Cuji habngamj Cungguk habngamj seizdaih

Siz Ginbingz youq ndaw aen baugau Ngeihcib Daih daegbied gangj daengz, mboujduenh raiz ok gij faenzcieng moq Majgwzswu Cuji habngamj Cungguk habngamj seizdaih, dwg diuzrap naekgw gyoengq vunz Cunghgoz Gungcanjdangj ciuhneix au rap hwnj ndeu.

De gangj, saedguh hawj raeuz ndaej rox, Cunghgoz Gungcanjdangj vihmaz baenz, aen sevei cuji miz gij daegsaek Cungguk vihmaz ndei, gangj daengz daj dwg aenvih Majgwzswu Cuji baenz, dwg aenvih gij Majgwzswu Cuji habngamj Cungguk habngamj seizdaih de baenz. Baengh gij gohyoz lijln Majgwzswu Cuji dazyinx, Dangj raeuz cijndaej daj gaenbonj bae dawzdingh sinyangj saenqniemh mboujbienq, dawzcinj yiengh cawjdoengh cauuhguh lizsij.

Siz Ginbingz youq ndaw baugau vixok, Cibbet Daih doxdaeu, hingzsei ndaw guk rog guk miz bienq caeuq saedguh miz iugouz moq, gaenj au raeuz daj lijln caeuq saedguh giethab bae haeuilaeg hoizdap baenzroix goqdaez seizdaih hungnaek gvendaengz saehnieb Dangj caeuq gukgya hwnghat, Dangj baenzlawz guenj guk ceih biengz. Dangj raeuz gamj bae damqra caeuq cauuhmoq lijln, au yiengh lwgda moqsak caiq haeuilaeg bae nyinhrox gij gvilwd Gungcanjdangj gaemgienz, gij gvilwd hwnqguh sevei cuji, gij gvilwd hwnghat aenbiengz vunzloih, lijln cauuhmoq aeundaeg cwnzgoj hungnaek, comzgiethab baenz Aen Swhsiengj Sevei Cuji Miz Gij Daegsaek Cungguk Seizdaih Moq. Cibgouj Daih, Aen Cienzhoih Baez Daihroek Gaij Cibgouj daezok "cib aen mingzbe doekdingh", "cibsei aen dingjmaenh", "cibsam aen fuengmien cingzik", gyonjgangj le gij cujyau neiyungz aen swhsiengj neix, itdingh au ciengzgeiz dawzmaenh caemhcai mboujduenh gyalai caeuq hwnghat dem.

Dawzdingh caeuq hwnghat Majgwzswu Cuji, itdingh au caeuq gij saedsaek Cungguk dox giethab. Yienghyiengh cungj daj saedsaek hwnjdin, daj gaijgez gij vwndiz saedceiq ok laeng gaijgwz hailangh caeuq hwnqguh sevei cuji yendaiva seizdaih moq bae naemj, mboujduenh hoizdap gij vwndiz Cungguk, gij vwndiz seiqgyaiq, gij vwndiz yinzminz, gij vwndiz seizdaih, dawzok gij dapanq cingqdeng habngamj gij saedsaek Cungguk caeuq gij iugouz seizdaih, ndaej daengz gij nyinhrox gohyoz hab gwzgvanh gvilwd, cauxbaenz gij lijln cwnzgoj ndaej riengz seizdaih baenaj, engq ndei bae dazyinx Cungguk guh saeh.

Dawzdingh caeuq hwnghat Majgwzswu Cuji, bietdingh au caeuq gij conzdungj vwnzva maenhndei Cunghvaz dox giethab. Cijmiz doek rag youq gwnz namhbiz lizsij vwnzva gukgya bonjfaenh, minzczuz bonjfaenh, Majgwzswu Cuji caenleix go faexhung neix cijndaej rag laeg mbaw mwn. Bietdingh au giendingh gagsaenq lizsij, gagsaenq vwnzva, dingjmaenh au doxgai ndei ciuhgeq daeu yungh, dauz gaeu ok moq, dawz gij ceiq ndei aen swhsiengj Majgwzswu Cuji caeuq gij ceiq ndei conzdungj vwnzva maenhndei Cunghvaz ronzoeng hwnjdaeu, caeuq gij gyaciz gvanhnen caezcaemh vunzlai haethaemh yungh cix mbouj roxyinh de doxyungz hwnjdaeu, hawj gohyoz lijln yied daeu yied miz gij daegsaek Cungguk, hawj Majgwzswu Cuji ndaej habngamj Cungguk habngamj

seizdaih engq miz giekdaej lizsij caeuq giekdaej ginzcung, hawj Majgwzswu Cuji youq Cungguk doekrag onjdup.

Siz Ginbingz daegbied gangj daengz, mboujduenh raiz ok gij faenzcieng moq Majgwzswu Cuji habngamj Cungguk habngamj seizdaih, dwg diuzrap naekgw gyoengq vunz Cunghgoz Gungcanjdangj ciuhneix au rap hwnj ndeu. Laebdaeb doicaenh doengqvaq saedguh bae cauuhmoq lijln, au dawzndei gij sigaiyvanh caeuq fanghfazln Aen Swhsiengj Sevei Cuji Miz Gij Daegsaek Cungguk Seizdaih Moq gonq, dawz ndei, yungh ndei gij lizcangz gvanhdenj fanghfaz ronzoeng goekbyai de.

——Bietdingh au seizseiz cuengq yinzminz youq vih daih' it. Sojmiz gij lijln duetliz yinzminz de cungj naiquiek unqnyieg, sojmiz gij lijln mbouj vih yinzminz cauuhfuk de cungj mbouj hengz ndaej nanz. Raeuz au ndwn maenh youq mbiengj yinzminz, dawzcinj gij simmuengh yinzminz, aeueiq gij dajcauh yinzminz, gyonjcomz gij coengmingz yinzminz, guhbaenz gij lijln yinzminz gyaemaij, nyinhdoengz, haeujuk haenx.

——Bietdingh au seizseiz gagsaenq gag' ak. Gyoengq yinzminz Cungguk caeuq Cunghvaz Minzczuz daj gwn gaeu gij cainanh naekcaem ciuhgyawj doxdaeu haenx byaij coh diuz roennaj ronghsag fukhwng hungmbwk, coengzlaiz mbouj miz saw son, engq mbouj miz dapanq gaenq baenz. Diuz roen Dangj raeuz buekguh bak bi guh ndaej baenz neix, dwg Dangj lingjdauj yinzminz gag ra ndaej gag guh ndaej okdaeu, bien faenzcieng Cungguk ndaw Majgwzswu Cuji dwg gij vunz Cunghgoz Gungcanjdangj baengh rengz bonjfaenh raiz okdaeu, ndawde diemj daj goek daengz byai au guhdaengz ndeu couh dwg gij vwndiz Cungguk itdingh au daj gij gukecingz giekbonj Cungguk hwnjdin, youz vunz Cungguk gag gejdap.

——Bietdingh au seizseiz souj goek cauuhmoq. Raeuz au yungh yiengh lwgda gohyoz bae doiqdaih gohyoz, yungh gij cingsaenz caenleix bae gyaepgouz caenleix, au gij cingsaenz gvaekgvaek bae doiqdaih sojmiz doenghyiengh moq, hawj nyinhrox yied daeu yied gya laeg mbe gvangq, gamj gangj gij vah vunz ciuhgonq caengz gangj gvaq, gamj guh gij saeh vunz ciuhgonq caengz guh gvaq, yungh lijln moq bae dazyinx raeuz guh gij saeh caengz guh gvaq.

——Bietdingh au seizseiz riengz vwndiz bae dazyinx hongsaeh. Lai comz rengz haeu gij vwndiz moq mwh saedguh bungzdaengz, gij vwndiz caengzlaeg ok laeng gaijgwz hwnghat onjdingh, gij vwndiz gaenjgip hojnanz youheiq deqmuengh ok laeng yinzminz ginzcung, gij vwndiz hungnaek ok laeng seiqgyaiq boekbienq, gij vwndiz haenqrem Dangj raeuz bienq ak bungzdaengz, mboujduenh daezok gij leixniemh moq lohnaemj moq banhfap moq ndaej caen gaijgez vwndiz haenx.

(cienj banj 5)